

**AWIG - AWIG**  
**DESA ADAT SESEH**



KECAMATAN MENGWI

KABUPATEN BADUNG



## SARA CITTA

OM Swastyastu,

OM Awighnamastu.

Malarapan antuk pasuwecan Ida Sang Hyang Widhi Wasa, saha asung Kertha Wara Nugrahan Ida ngewentenang kauripan Bhuwana Agung lan Bhuwana Alit jangkep saha Tri Hita Karana, gumanti sida adung patemon kang Bhuwana kalih ngawetuang keufipan sekala niskala, kasinanggeh make murdhaning prayojanan pangriptaning Awig-Awig.

Desane pawakan Bhuwana Agung, Awig-Awig gumanti uger-uger pamargi, mangdene sida mikukuhang lan ngawangun sukertaning Desa sareng Krama Desania tur kasungkemin antuk Dharma, Prawertinia ngerajegang Shang Aji Agama manut sastra dresta.

Sewosin ring dresta inucap, pamekas Pancasila lan Undang-Undang Dasar 1945 miwah sahananing Peraturan-Peraturan Negara Republik Indonesia tan maren keinggilang tan wenang kalempasin antuk daging Awig-Awig puniki.

OM ksama sampurna ya nama Swaha.

OM Shanti - Shanti - Shanti OM.

SARGA I

ARAN LAN WEWIDANGAN DESA

Palet 1

ARAN DESA

Pawos 1

Desa puniki mewasta Desa Adat Seseh.

Palet 2

WEWIDANGAN

Pawos 2.

Wewidangan Desa Adat Seseh mewates nyatur, luwirnia  
(inggih punika) :

Sisi Lor / *Lelur* Subak Cemagi Let.

Sisi Wetan / *lawa* Subak Munggu.

Sisi Kidul / *Kelod* Segara Indonesia.

Sisi Kulon / *Kawad* Subak Cemagi Let.

Pawos 3.

Wewidangan Desa Adat Seseh ngemanggehang 1 (siki) Banjar  
Dinas utawi 1 (siki) Banjar Adat, sane mewasta  
Banjar/Dusun Seseh utawi Banjar Adat Seseh.

SARGA II

PAMIKUKUH LAN PATITIS

Palet 1

PAMIKUKUH

Pawos 4

Desa Adat Seseh ngemanggehang Pamikukuh :

1. Pancasila.
2. Undang-Undang Dasar 1945 pamekas pasal 18.
3. Perda Propinsi Dati I Bali, No. 6 tahun 1986.
4. Tri Hita Karana, manut tatwaning Bhuwana Agung.

Palet 2

## PATITIS

Pawos 5

Patitis Desa Adat Seseh.

1. Mikukuhang miwah ngarajegang Agama Hindu majalaran antuk astiti bhakti ring Ida Sang Hyang Widhi WaCa.
2. Nginggilang tata prawerti ring megama saha nincapang kawerdian Desa Adat.
3. Ngawangun lan ngarajegan kesukertan Desa saha pawongannia malarapan antuk pasilih asih salunglung sabhayantaka.
4. Ngerajegang Pasukertan sraja druwening Desa lan pawongannia.

SARGA III

## SUKERTA TATA PAKRAMAN

Palet 1

### INDIK KRAMA

Pawos 6

Sane kasinanggehang Krama Desa inggih punika : kulawarga sane ngemanggehang Kahyangan Tiga, turmaning megama Hindu, saha maduwe karang paumahan ring wewidangan Desa Adat Seseh.

Pawos 7

Tamiu sane megama Hindu sampun jenek saha madruwe karang paumahan tur sampun naur batu-batu pakraman, kasinanggehang Krama Desa.

Pawos 8

Mageng batu-batu inucap, manut pararem.

Pawos 9

Krama Desa kadi inucap pawos 7 patut ngariyinin mawirasa sareng Prajuru Desa saha ngaturang bhakti ring Kahyangan Tiga malarapan antuk Upakara Pejati.

Pawos 10

Tamiu megama Hindu miwah tiosan sane ngeranjing ring Desa Adat Seseh gumanti ngarereh pangupajiwa turmaning jenek lintang ring a sasih, patut masadok ring Prajuru Adat lan Dinas, malarapan antuk ilikita pastika.

Pawos 11

Tamiu inucap ring pawos 10 keni sedana manut pararem Krama Desa Adat, saha tinut ring tetiwak Desane, nganutin indik ngupadi kasukertan Desa ring sekala.

Pawos 12

Sang sane tiosan ring Agama Hindu sane sampun jenek saha sampun madruwe karang paumahan ring wewidangan Desa Adat Seseh sane pecak sareng mekrama Desa/Banjar, patut naur sedana krama makeh ipun manut pararem. ←

Pawos 13

Paletan Krama Desa inggih punika : Krama ngarep, Krama Balu lan Krama Roban.

1. Krama ngarep inggih punika krama sane sampun marabian tur sampun katedunang makarama Banjar manut kadi uger-uger sane mamargi ring Desa Adat Seseh.

2. Krama Balu inggih punika sang pegat marabian melarapan antuk katinggalin seda, palas marabian.
3. a. Krama Roban inggih punika para alit-alit miwah para yowana sane sampun kapupulang ring Sekaa Truna.  
b. Krama Roban, kulawarga sane malinggih utawi nenten jenek ring Desa Adat Seseh, sakewateu eling ring Kahyangan Tiga sane wenten ring Desa Adat Seseh.

Pawos 14

Ngawit tedun makrama Desa wantah mikukuhin daging awig-awig Desa Adat. Indik nedunang Krama Pengarep sane nenten piwal ring daging pawos 6 inucap ring ajeng, tur sesampune marabian lintang ring 6 (enam) sasih wit saking pawiwahan.

Pawos 15

Krama Desa keni ayah-ayahan sekadi : Ayah ngarep saking krama pengarep, ayah Balu manut Balun ipun, ayah roban sakeng Sekaa Truna lan sane nenten jenek ring Desa Adat inucap.

Pawos 16

Sahananing Pamidanda (Dedosan) sajeroning ayah-ayahan ring Desa Adat manut pararem.

Pawos 17

Tategenan miwah Pepeson katiwakang ring : Krama pengarep lan krama balu keni pepeson sawungkul, utawi krama roban sane nenten jenek ring Desa Pekraman.

Pawos 18

Krama Desa polih patias sekadi : pesayuban, nyarengin paruman saha mastikayang pamutus, mepwangkid, miwah sane tiosan, malarapan antuk kawenangan Kelian Desa Adat.

Pawos 19

Krama Desa patut ngemangehang Swadharmaning Negara miwah Swadharmaning Agama saha tinut ring daging Awig-Awig Desa.

Pawos 20

Wusan makrama Desa :

1. Sangkaning megingsir genah sakeng wewidangan Desa Adat Seseh.
2. Sangkaning wusan makrama Banjar Adat.
3. Sangkaning sampun kepastikayang piwal ring pemargin Desa melarapan antuk pamutus pararem Desa.

Pawos 21

Sapa sira ugi Krama Desa sane wusan mapekraman ring Desa Adat Seseh nenten polih pahpahan harta branan Desa.

Palet 2

**INDIK PRAJURU**

Pawos 22

Pepalihan Prajuru Desa Adat Seseh, inggih punika :

1. Kelian Desa Adat pinaka Murdhaning Desa Adat.
2. Pengliman Kelian Desa Adat pinaka penyelidihi Kelian Desa Adat.
3. Penyarikan Kelian Desa Adat.

4. Petengen/Bendahara Desa Adat.
5. Kesinoman Desa pinaka Juru Arah.

Pawos 23

Kelian Desa Adat utawi Pengliman, kapilih melarapan antuk pararem utawi Pengliman, Enggih punika Krama Desa sane sampun dados krama ngarep, utawi pengarep inggilang linggih, saha dedudonan sane tiosan manut pamutus pararem inggih punika :

- a. Uning ring tata titi pamargin agama
- na. Nenten naenang ngryaning biyuta ring Banjar utawi ring Desa Adat.

Pawos 26

Swadharmaning Prajuru Desa, luiripun :

1. Ngenterang pangelaksanaan sedaging Awig-Awig utawi pararem Desa, rahuhin Krama Desa jagi ngulati tetujon manut ring patitis Desa.
2. Mawosang kalih niwakang pamutus sehananing wicaran Krama Desa.
3. Nuntun saha nyaksinin tata cara miwah pengaskaraning kauripan sane mabuat, sane ngilitang sulur Krama Desa.
4. Maka Duta Desa sajeroning matemuang bawos ring sapa sira ugi.

Pawos 27

Petiyas utawi ulih-ulihan Kelian Desa Adat sareng Pengliman, merupa upon-upon tanah druwen Desa sane kepastikayang dados pecatu, saha sane tiosan manut pararem.

Pawos 28.

Kelian Desa Adat utawi Pengliman kegentosin ngelimang warsa, ritepengan ngembak geni sajeroning sasih Kesanga, saha wenang mewali kapilih, utawi padgata kerariangang antuk Krama Desa sedurung wates warsane, riantuk iwang pumargi, sane kepastikayang antuk pararem.

Pawos 29

Prade Kelian Desa Adat seda sadurung watesnia, pengliman Kelian Desa Adat keadegang dados Murdhaning Desa jantos puput warsania.

Palet 3

**INDIK PARUMAN**

Pawos 30

Paruman luwirnia : Paruman Krama Desa, Paruman Krama Banjar, Paruman Sekaa Truna, Paruman Prajuru lan Pamucuk, saha kemargiang :

1. Paruman Krama Desa, a sasih apisan.
2. Paruman Krama Banjar, a sasih apisan.
3. Paruman Sekaa Truna, a sasih apisan.
4. Paruman Prajuru lan Pamucuk, manut Pangarsa utawi kegunannia.
5. Sakaluring Paruman dados padgata kala kawentenang manut ring Pangarsa utawi kagunannia.

Pawos 31

Ritepengan pacang parum patut :

1. Para pamilet mangdane mabusana adat.

2. Wenten upakara paruman, minakadi : prayascita, biyokawonan, Cane lan upakara pemawos, ngelantur kekawitin antuk muspa.
3. Ngawit pemargi jantos pemutus paruman kesinanggeh Pararem, mangda mecihna gilik saguluk saha mapitegep pelaksanaan Awig-Awig Desa utawi Banjar.

Pawos 32

Sang sane nenten sida ngarawuhin Paruman turmaning nenten wenten pisadok, patut tiwakang pamidanda.

Palet 4

**INDIK KULKUL**

Pawos 33

Swaran kulkul pinaka cihna atur mantuk ring Krama desa utawi Banjar, sajeroning ngemargiang tata pekraman.

Pawos 34

Manut kawigunannia sekadi inucap ring pawos 33, Kulkul Desa utawi banjar patut kaupakarayang.

Pawos 35

Kulkul ring Desa Adat Seseh, wenten sekadi ring sor :

1. Kulkul Krama Desa
2. Kulkul Krama banjar
3. Kulkul Krama Subak
4. Kulkul Pura Kahyangan Desa, miwah pura-pura sane tiosan.
5. Kulkul Sekaa Truna-Truni, Sekaa Gong, miwah sekaa sane lianan.

Pawos 36

Swaran kulkul sane kerajegang ring Desa Adat Seseh, sekadi ring sor puniki :

1. Suara apisan, cihnan ipun : Embas (meduwe Oka).
2. Suara ping kalih, cihnan ipun : Ngerangkat (nganten).
3. Suara ping tiga, cihnan ipun : Kelayu Sekar (seda utawi padem).
4. Suara lamban memanjang, cihnan ipun : Krama Desa utawi banjar lumaksana ngemargiang karya manut arah-arahan Prajuru.
5. Suara bulus memanjang, cihnan ipun : Genibaya (Pancabaya) utawi kedurmangalan sane tiosan.
6. Suara bulus kalih tulud, cihnan ipun : wenten kemalingan kebaak, kebegal, miwah sane lianan.
7. Suara bulus tigang tulud, cihnan ipun : Jiwabhaya minakadi keamuk, yudha, miwah sekancan ipun.
8. Suara lamban memanjang pateh sekadi wilangan papat, cihnan ipun : bhaya sampun sida katulungin utawi sampun aman.
9. Suara ping kalih panggél tiga, cihnan ipun : Krama Desa utawi Banjar mangdane siaga.
10. Suara ngumpang, cihnan ipun : wenten iinuh, bulan kepangan, lan sura gra.

Pawos 37

Sajeroning wenten tengeran swaran kulkul, sane macihna wenten pancabhaya sekdi inucap ring pawos 36, patut kesaurin antuk swaran kulkul sane pateh ring soang-soang Banjar Adat, lan ring soang-soang Desa Adat sane tiosan.

Pawos 38

Krama Desa utawi Banjar patut medal saha tegep ring gegawan utawi aban-aban manut pawilangan pancabhaya inucap, saha sakeng sarat matulung.

Pawos 39.

Kulkul Desa utawi Banjar tan wenang katepak (kasuarayang) tiosan olih prajuru, utawi sang sane kapituduh antuk I prajuru, sakewaten sajeroning kapancabhaya sapisira ugi kedadosang melaksana nyuarayang Kulkul Desa utawi Banjar.

Pawos 40

Prade wenten sane tiwal nyuarayang kulkul tan manut tengeran pancabhaya, wang inucap patut katiwakang danda gung artha, manut perarem.

Palet 5

**INDIK DRUWEN DESA**

Pawos 41

Druwen Desa Adat Seseh : Pura Kahyangan Tiga, sedagingnia, sekala lan niskala.

Pawos 42

Druwen Banjar Adat Seseh Desa Adat Seseh sane lianan, sekadi ring sor :

1. Tanah telajakan Pura Kahyangan Tiga lan Merajapati.
2. Sawah pelaba Pura Desa, Persil No ..... pipil No. .... Kls. II, luas 2.675 m<sup>2</sup> (Subak Cemagi Let)
3. Sawah pelaba Pura Dalem, Persil No. .... 170, pipil No ..... Kls. II, luas : 2.500 m<sup>2</sup>.
4. Tanah tegalan pelaba Pura Banjar Adat Seseh, Desa Adat Seseh :

- a. Persil No.14 DP Pipil No.59,Kls. II luas: 2.215 m<sup>2</sup>
- b. Persil No.14 DP Pipil No. 59,Kls.II luas: 175 m<sup>2</sup>
- c. Persil No. 4 SP Pipil No. 56,Kls. II luas : 700 m<sup>2</sup>
- d. Persil No. 4 SP Pipil No.56,Kls. II luas : 350 m<sup>2</sup>
- e. Persil No. 4 DP Pipil No. 56,Kls.II luas :1.900 m<sup>2</sup>
- f. Persil No.14 DP Pipil No. 59, Kls.II luas : 530 m<sup>2</sup>
- g. Persil No. 4 DP Pipil No. 56,Kls.II luas :1.950 m<sup>2</sup>

Pawos 43

Kawigunan tanah padruwen Banjar Adat Seseh, Desa Adat Seseh sekadi inucap ring pawos 42, pamuponna keanggen prabya ring Pura Kahyangan Tiga miwah sane lianan, kekirangnia antuk urunan Krama Desa manut perarem.

Pawos 44

Tanah druwen Banjar Adat Seseh, Desa Adat Seseh tan kengin keadol, katukar utawi kegadeang sejabaning wenten perarem Desa sane matutang pemargi lianan, sane kawigunannia manut ring patitis Desa.

Pawos 45

Prajuru (Kelian Desa) wenang ngetangang seananing pedruwen Desa ngelantur nyabran Paruman Desa patut nyiarang seperi indik wunjuk lungsur pedruwen Desa antuk illikita pastika.

Pawos 46

Setra Druwen Desa, wantah pelebahan.

Pawos 47

Gang lampus sangkaning sakit ila, gering agung, risampun kaupakara antuk banten penebusan lan pangulapan, kengin kependem utawi kegeseng ring setra ageng.

Palet 6

## SUKERTA PAMITEGEP

Kaping 1

### PEKARANGAN

Pawos 48

Soang-soang palemahan karang paumahan ring Desa Adat Seseh, mangdene sida mangguhng katreptian lan kasukortan, kadabdabang sekadi asapuniki :

1. Patut wenten wates antuk pagehan utawi tembok, saha wenten margi, mangda nenton wenten karang kebebeng.
2. Wates karang meulu keluwan : wates sisi kangin lan sisi kaler patut kekaryaning olih sang maduwe karang, saha sampun kecumponin olih pengadinnia.
3. Wates karang sane meajeng kemargi mangdene kanten asri, patut kekaryaning wates antuk sang maduwe karang.
4. Karang patelajakan sane wenten ring pemargin desa, patut kepelihara olih sang maduwe karang manut watesnia.

Pawos 49

Nenten kepatutang ngalahin tanah padruwen Desa, utawi karang sane tiosan, ngembahang yeh/toya, ngentungang wangken wewalungan, miwah sane lianan, sane ngeweluang reged, kekarang wang lianan, utawi ke margine lan ke telabahane. Sapasira ugi sane tiwal ring daging pawos puniki, patut tiwakang danda manut perarem.

Kaping 2

## PEPAYONAN

Pawos 50

Ngawit nandur pepayonan adepa agung (2,5 meter) ngajeroang sakeng wates pekarangan.

Pawos 51

Nenten kalugra wenten wit pepayonan sane sajeroning wates semalih sane ngelintangin wates, bilih-bilih sane pacang mayanin.

Pawos 52

Prade wenten pepayonan sane ngalintangin wates utawi mecihna pacang mayanin, sang pengadinnia patut masadok ring sang neruwenang pepayonan inucap saha mesadok ring Prajuru.

Pawos 53

Pepayonan inucap ring pawos 52 patut kepademang utawi kepongol manut ring gagulak sepat gantung, saha kelaksanayang antuk sang neruwenang pepayonan inucap.

Pawos 54

Mewates laminnia kalih wuku, sang ndruwenang pepayonan nenten nagingin pewarah pengadinnia, mewastu pepayonan inucap mayanin, patut sang medruwe pepayonan punika keni pamidanda penyangaskara lan prabya manut perarem.

Pawos 55

Penyangaskara sekadi inucap ring pawos 54, senistannia prayascita jangkep, tur mecikang sane kerubuhin nyantos puput.

Pawos 56

Pepayonan sane tan keni warahang, sangkaning kedurmangalan, ngerubuhin pedruwen pengadinnia, sang meduwe pepayonan patut ngupakara prayascita, lan pepayonan sane rubuh ngelintang wates, dados keambil olih sang pengadin sane keni bhaya.

Pawos 57

Pepayonan sane kebak, ketotor, kepongol turmaning ngrubuhin wewangunan pengadinnia patut keni sisip prabya mecikang wewangunan sane rubuh, saha melarapan antuk upakara pemerayascita.

Kaping 3

**WEWANGUNAN**

Pawos 58

Wewangunan patut ngangge gegulak saha ngemanggehang Asta Kosala Kosali lan Asta Bumi, melarapan antuk patitis Niskala.

Pawos 59

Sehananing wewangunan tan patut ngelintangin wates pekarangan utawi nyayubin karang pengadinnia, semalih yeh/toyan ceracapan wewangunan inucap nenten kepatutang nibenin karang wang tiosan.

Pawos 60

Prade wenten wewangunan sekadi inucap pawos 59, patut keni warahang sakeng pengadinnia, saha patut ketiwakang pamidanda manut ring perarem.

Pawos 61

Wewangunan ring tepi siringan wates, patut paigum ring pengadinnia saha wenten pesadok ring Prajuru Desa utawi Banjar.

Pawos 62

Wewangunan ring Pura Kahyangan Tiga, manut dresta wantah katulanggiyangan antuk : Krama Desa.

Pawos 63

Wewangunan ring Pura Desa :

Sakeluwiring wewangunan katulanggiyangan antuk Krama Desa.

Pawos 64

Wewangunan ring Pura Puseh :

Sakeluwiring wewangunan katulanggiyangan antuk Krama Desa.

Pawos 65

Wewangunan ring Pura Dalem.

Sakeluwiring wewangunan katulanggiyangan antuk Krama Desa.

Pawos 66

Sehananing ring Pura Merajapati, kasungkemin antuk Krama Desa.

Pawos 67

Wewangunan ring Pura Gede Ulun Siwi :

Sakeluwiring wewangunan katulanggiyangan antuk penyungsong lan Krama Subak minakadi : meru tumpang solas, meru tumpang tiga, papelik sari (kalih), bale slambangan utawi sane tiostiosan.

Pawos 68

Wewangunan ring Pura Dalem Penataran :

Sekeluwiring wewangunan katulanggiyangan antuk pemksan/Desa melarapan pemutus Desa ilikita No. 02 / DAS / 1987, tanggal 5 Agustus 1987 minakadi gedong simpen, Bale Slambangan sekadi sane kesuratan ring lampiran sor puniki.

Pawos 69

Sehananing wewangunan ring Pura Segara ketulanggiyangan antuk penyungsong minakadi, Gedong (kekalih), lan slambangan.

Pawos 70

Sekeluwiring wewangunan ring Pura Dalom Batu Bolong, ketulanggiyangan antuk penyungsong Desa melarapan pemutus Desa minakadi ilikita No. 02/Das/1987 tanggal 5 Agustus 1987, minakadi : Meru tumpang tiga, padmasana, Gedong, Bale Pengaruman, utawi sane tiyos-tiyosan.

Pawos 71

Sekeluwiring wewangunan ring Pura Tirta Empul, ketulanggiyangan antuk penyungsong Desa melarapan pemutus

PEMINTAH DESA MUNGGU  
KELIAN DESA ADAT SESEH

PEMUTUS KRAMA DESA

Nomor : 02/Das/1987

Medasar antuk pesuaran peparuman "KRAMA DESA ADAT SESEH" sane kewentenan ring dina Buda Cemeng Menail titi tanggal 10 (dasa) yusaning warsa 1909 ICaka, tanggal 5 bulan Agustus warsa 1987 Masehi.

Kewentenan Pura minakadi Sad Utawi Dang Kahayangan inggih punika saluire :

1. Dalem Penataran.
2. Dalem Batu Bolong meruntukan Toya Anakan Utawi Tirta Empul, sane wenten ring sajabagan Desa Adat Seseh.

Wit rahina ring tanggal taler ICaka ring ajeng sampun kejanentang kewengku, kecakep antuk "Krama Desa Adat seseh"

Sakewanten ring Pura Dalem Batubolong sane pinaka Pemucuk (pengemong) inggih punika Kula Warga "I Gusti Made Puger" (Jeroan Anggungan) sane magenah ring wewidangan Desa Adat Anggungan Sempidi, Kecamatan Mengwi Kabupaten Dati II Badung.

Sawentennyane Krama Desa Adat seseh ngewengku rauhang nyakep Pura Sad utawi Dang Kahayangan sane sampun kesinanguhan ring ajeng punika wantah indik pangebakti medasar antuk sesidan-sidan.

Indik sahe upakara sane patut katur ring Ida Bhatara minakadi pujawali (Pengodalan) rahuhing sakeluirin ilen-ilen ipun tan wenten sepengeruhnyane saking Desa.

Asapunika Ilelita puniki kekaryanin mangde wenten keanggen uger-uger antuk penyungsung pura rauhang Prajuru.

Ilakita mangda kewastanin jangkep kalingga tanganin antuk Prajuru Desane pinaka Wakil Krama Desa Adat taler penyarikan pura minakadi wakil penyungsung taler kesaksi antuk prajuru Kelian Dinas Banjar Seseh.


Diperadene ring sajeroning ilakita puniki kepanggihang sane tan manut ring Desa, jaga kewawanin malih.

Seseh, 25 Nopember 1994.

Kesalin Manut Aslin ipun olih Bendesa/Kelias Desa Adat Seseh.

Juru Sunggi/Songsong :


Pura Dalem Penataran, Pura Dalem Batubolong,



I Nyoman Dendi. I Ketut Gangsyuh.



KEUNINGAN OLIH :  
Kepala Dusun/Dinas Banjar Seseh,



Desa minakadi illikita No. 02/Das/1987, tanggal 5 Agustus 1987 sekadi sane menggah ring sewala patra ring lampiran sor puniki minakadi : Gedong (kekalih), Bale Pengaruman, Bale slambangan utawi sane tiyosan.

Pawos 72

Wewangunan ring Pura Mas Sepuh Ratu Mas Wilis, ketulangiyan antuk Puri Sibang Gede Kecamatan Abiansemal, minakadi : Meru tumpang solas, Gedong, Bale slambangan utawi sane tiyos-tiyosan.

Pawos 73

Wewangunan ring Pura Batu Nunggal, ketulangiyan antuk penyungsung, minakadi : Gedong lan Bale Slambangan.

Kaping 4

**WEWALUNGAN**

Pawos 74

Sakeluiring wewalungan nenten kapatutang :

1. Kelumbar, mangda tan ngerusak utawi ngeletehin Parahyangan.
2. Keangonang ring wewidangan genah suci, minakadi ring Parahyangan.

Pawos 75

Wewalungan sane malumbar saha ngerusak padruwen wang tiyosan wenang ketaban tur kesadokang ring Prajuru.

Pawos 76

Wewalungan inucap ring pawos 75 kewaliang ring sang madruwe, risampun naur danda penebusan utawi sane tiyosan ring Prajuru, sane paletan ipun sekadi ring sor :

1. Ngewaliang prabya pengentos papocolan, pradene wewalungan inucap ngerusak tetanduran utawi wewangunan.
2. Kekenin penyangaskara lan prabya manut perarem, pradene wewalungan inucap ngerusak Parahyangan.
3. Pahpahan pamidanda kasukserahang ring prajuru.

Kaping 5

**B H A Y A**

Pawos 77

Indik bhaya manut ring wacakan Pancabhaya, inggih punika :

1. Jiwa bhaya, upami kerancab utawi kepet patinnia.
2. Artha bhaya, upami kepondung utawi kemalingan.
3. Geni bhaya, upami umah puwun.
4. Er bhaya, bayu bhaya, linuh bhaya, inggih punika bhaya sangkaning kedurmangalan.
5. Dura cara ring Adat lan Agama upami :
  - a. Dura cara ring Adat minakadi mesenggama sareng buron, agamia miwah sane tiyosan.
  - b. Dura cara ring agama, minakadi ngerusak Parahyangan sedagingnia sekala lan niskala, miwah tiyosan.

Pawos 78

Sakawentenannia bhaya sekadi inucap, patut nyuarayang kulkul manut pepalihan suaran kulkul, sekadi inucap ring pawos 36.

Pawos 79

Wang sane ngelaksanayang Dura cara ring ADat lan agama, saha bhaya sane tiyosan ring Desa Adat Seseh, melarapan saksi lan bukti pastika, patut tiwakang pamidanda penyangaskara lan prabya manut perarem, saha katur ring Guru Wisesa.

Kaping 6

## P E N Y A N G G R A

Pawos 80

Sinalih tunggil Krama Desa/Banjar ngewangun karya Panca Yadnya, dados nunas penyanggra ke Banjar, sedurunge patut wenten pemuput bawos ring Prajurun Banjar.

Kaping 7

## PEMARGIN LAYON

Pawos 81

Pemargin layon ritatkala mendem utawi ngeseng ring setra, patut ngangge margi Desa Adat sane sampun kepastikayang manut dresta.

Pawos 82

Pemargin layon sekadi inucap ring pawos 81, nenten dados ngelintangin layon tiyosan utawi ngelangkar watang, taler nenten dados ngangge margi Adat ring Pura Gedo Ulun Siwi lan Pura Dalem Batu Bolong.

Pawos 83

Pemargin layon sane kantun mayusa alit (durung daha utawi teruna) patut metatuh utawi mepapah, nenten kelugra

mesandang (metegen), yan sampun maketus patut mesandang (metegen).

Pawos 84

Pemargin layon mangda sida trepti, nenten kepatutang parisolah ngarap layon.

Kaping 8

### KECUNTAKAN

Pawos 85

Kecuntakan ring Banjar utawi Desa sane melarapan antuk kelayuan, ngawit sakeng tengeran suaran kuikul ping tiga kepertama, jantos tutug tigang rahina risampun wusan meprayascita lan mabiyukawon.

Pawos 86

Yan ngaben ngelanus, ring Banjar benjangnyane sampun ngaturang prayascita lan biyukawonan.

Pawos 87

Yan wenten patirtan, malih tigang rahina ring Pura lan wenten pengabenan utawi padem, petang rahina pemargine keaben utawi kependem.

Sane ngelaksanayang patirtan wantah Pemangku kemanten wantah ngaryanang dapetan kewanten, banjar sane tiyosan patut kekubon sang maduwe padem.

Pawos 88

Prade Atiwa-tiwa ngerit ring Desa, kecuntakan Banjar lan Desa sakeng ngewangun jantos tutug tigang rahina.

Pawos 89

Kecuntakan sang maduwe layon durung kepus udel lamina awulan pitung rahina, sane sampun kepus udel dados roras rahina, sakeng sulur pakilitan pesemeton taler roras rahina.

Pawos 90

Krama Desa sane kasinanggeh cuntaka, nenten kedadosang ngeranjing ke Pura utawi genah-genah suci sane lianan, sewosan ring Pura Dalem Kahyangan lan Pura Merajapati.

Pawos 91

Bobotang sane wenten utawi nenten wenten ngangkenin (Lokita Sanggraha) mewastu ngamedalang oka, kebawos pianak babinjat, biyang lan okannyane patut kaupakara sepatutnia, saha kesaksinin antuk Prajuru Desa miwah Panjar, mandene rare inucap nenten ngelantur keni cuntaka.

Sang ngardi bobotan inucap patut keni pamidanda upakara penyangaskara Desa.

Pawos 92

Pemangku tan kepatutang : mangbang utawi ngaryanang pendeman, negen wadah utawi layon.

SARGA IV

SUKERTA TATA AGAMA

Palet 1

INDIK DEWA YADNYA

Pawos 93

Pura-pura sane kemanggehang Kahyangan Tiga : Pura Desa Bale Agung, Pura Puseh, Pura Dalem Kahyangan lan Merajapati.

Pawos 94

Piodalan ring Pura Kahyangan Tiga :

1. Pura Desa : Buda Wage, wuku Langkir
2. Pura Puseh : Waraspati Umanis, wuku Pahang
3. Pura Dalem lan Pura Merajapati : Waraspati Umanis wuku Pahang
4. Yening pujawalin Ida Bhatara ring ajeng nemoning Purnama utawi Tilem patut ngaturang pujawali jeli tur melasti ke segara.

Pawos 95

Penyanggra Piodalan ring Pura Desa :

1. Piodalan Pelinggih sane dados pederben Desa, kekaryanin antuk Desa Adat Seseh.

Penyanggra Piodalan ring Pura Puseh :

1. Piodalan pelinggih-pelinggih sane magenah ring Pura Puseh kekaryanin antuk Desa.
2. Piodalan pelinggih pelingsem Besuki, kekaryanin antuk Krama Desa Adat sane magenah ring Pura Puseh.

Penyanggra Piodalan ring Pura Dalem Kahyangan :

1. Piodalan pelinggih-pelinggih sane magenah ring Pura Dalem Kahyangan lan Merajapati kekaryanin antuk Desa.

Pawos 96

Nemoning rerahinan :

1. Rerahinan ring Pura Kahyangan Tiga : Purnama, Tilem, Kajeng Keliwon, Waraspati umanis, Galungan, Kuningan.
2. Sajeroning Ida Bhatara nyejer ring Bale Agung.



Pawos 101

Prade wenten pasemeton Mangku Seda, upakara piodalan ring Pura sane patut kesanggra antuk Mangku, kekaryanin antuk Desa, prabeyane kamedalang antuk Desa.

Pamiteges : 1. *Prade Mangku Kahyangan Tiga utawi turunania sane jenek ring paumahannia seda, piodalan ring pura nenten kedadosang utawi nyerepan.*

Pawos 102

Piodalan ring sinalih tunggil Pura Kahyangan Tiga, nenten kedadosang utawi nyerepan, sewosan sekadi inucap ring pawos 101, tepengan wenten :

1. Kelian Desa utawi Pangliman lan Pemangku Kahyangan tiga seda, sedurung sengker tutug tigang rahina.
2. Sedurung tutug tigang rahina sajeroning Desa ngewentenang Pitra Yadnya pengertian utawi Pitra Yadnya sane tiosan, sane janten kesanggra antuk Desa.
3. Kecuntakan Desa sane lianan.

Pawos 103

Ritepengan kecuntakan Desa, piodalan ring Pura-pua Dang Kahyangan lan pura-pura sane lianan, sewewidangan Desa Adat Seseh taler nenten kedadosang utawi nyerepan.

Pawos 104

Mikukuhan lan ngerajegang pemargin sastra dresta separi indik Saraswati lan prawani Kepitu (Siwa Latri).

Pawos 105

Pura-pura Dang Kahyangan ring Desa Adat Seseh, minakadi :  
Pura Segara, Pura Dalem Penataran, Pura Gede Ulun Siwi, Pura  
Dalem Batu Bolong lan Toya Anakan, Pura Mas Sepuh Mas Wilis,  
Pura Batu Nunggul, lan Pura Pengulun Subak. Kepekelingan  
antuk Kelian Desa/Kaelingan antuk Desa.

Pawos 106

Nyanggra rahina Galungan lan Kuningan, sekadi ring sor :

1. Penyarikan Desa ngewentenang arah-arahan, indik Galungan  
nadi miwah nenten nadi.
2. Galungan ketiben Purnama saha Tilem, kemanggehang Galu-  
ngan Nadi.
3. Ngencak Galungan melarapan antuk pemutus Desa.

Pawos 107

Ring rahina Pengerupukan, patut kawentenang tabuh rah ring  
ajeng Bale Agung.

Pawos 108

Rahina Nyepi patut kelaksanayang antuk Krama Desa Adat Seseh  
inggih punika : amati geni, amati karya, amati lelungan,  
amati lelangan.

Pawos 109

Brata penyepian kemargiang sakeng rahina semengan jantos  
benjang semengan sakeng rahina penyepian, lan sapa sira ugi  
memurug patut tiwakang danda gung artha manut perarem.

Pawos 110

Mesima Krama (medharma santhi) kemargiang ring Ngembak Geni,  
utawi rahina sane siosan manut pemutus Kelian Desa Adat.

Palet 2

### INDIK RSI YADNYA

Pawos 111

Ring Pura Kahyangan Tiga, Pura Dang Kahyangan, Pura Pengulu  
Subak, lan pura-pura sane tiyosan, mangda ngadegang Pemangku  
miwah Penyarikan, melarapan antuk upakara pewintenan  
(mediksa widhi).

Pawos 112

Ngadegang Pemangku, Penyarikan, ring Pura Kahyangan Tiga  
miwah ring Pura Dang Kahyangan kemanggalaning antuk Kelian  
Desa Adat mungging Prabeya antuk Desa/Penyungsung.

Pawos 113

Pemargin upakara yadnya patut kepatutang antuk :

1. Pemangku Kahyangan tiga : Upakara Desa Yadnya, Upakara  
Butha Yadnya, miwah upakara-upakara sane tiosan sane  
keincapang ke luhur.
2. Sang sane muput : manut dudonan upakara.

Palet 3

### INDIK PITRA YADNYA

Pawos 114

Genah mendem utawi ngeseng layon pedreben Krama Desa Adat  
Seseh kewastanin setra.

Pawos 115

Rahina mendem utawi ngeseng layon, melarapan antuk padewasan pemargi saking Kelian Desa lan panugran Ida Sang Sulinggih sane pacang muput.

Pamiteges : Sajeroning ngaben, pedewasan sane dados kemargiang inggih punika pananggalan dewasa sakeng Kelian Desa Adat lan Sulinggih sane muput.

Pawos 116

Sajeroning a rahina nenten dados ngeseng utawi mendem layon lintang ring kekalih sewewidangan sotra, semalih nenten dados mendem utawi ngeseng mekirim.

Pamiteges : Nagngge sotra sajeroning ngeseng utawi mendem layon pet lintang ring kekalih, manut pidabdab saha pemutus Kelian Desa Adat.

Pawos 117

Indik kedadosang mendem mekingsan utawi mekingsan di Geni, manut pemutus Kelian Desa Adat.

Pawos 118

Layon sane mejalarang salah pati, ulah pati lan sokancanipun kengin kebakta budal lan kependem utawi kegeseng melarapan antuk upakara sepatutnia.

Pawos 119

Prade wenten wang tiyos Desa mendem utawi ngeseng layon ring setra druwen Desa Adat Seseh, patut kakenaning penanjung manut perarem, saha upakara sepatutnia manut agama Hindu.

Pet wenten layon sang tiyos sane wenten ring sajeroning Desa Adat, ngayunan indike asapunika, Krama Dera ngawentenang pararem/paruman. (Penanjung Batu inucap manut perarem saha upakara manut agama Hindu).

Pamitoges : Sang madrebe layon sane kependem inucap, sajeroning desa ngerit, patut sareng lan tinut manut agama Hindu)..

Pawos 120

Asing-asing Krama Desa Adat Seseh sane madruwe layon mependem, patut keabenang ritatkala desa ngenangiang ngaben pangeritan.

Pawos 121

Prade wang seda ngadut manik (mobot) tan wenang kependem utawi kegeseng, sedurung bobotnyane punika embas.

Pawos 122

Prade wenten jadmja seda dereng nepandes, sane kaucap sampun munggah daha/teruna utawi sampun merabian, patut metatah riyin wawu dados kependem utawi kegeseng.

Pawos 123

Siosan ring setra psderben Desa Adat Seseh, tan pisan kedadosang/kepatutang mendem utawi ngeseng layon, olih Krama Desa lan sekancan wang tiosan.

Pawos 124

Sapa sira ugi Krama Desa sane mederbe kapialangan seda utawi mantuk, patut mesadok ring Prajuru Desa Adat.

Pawos 125

Nenten kepatutang nginepang bangbang ring setra, lan prade bangbang sane nenten durus meanggen mendem layon patut kaupakarayang sepatutnia.

Pawos 126

Ngaben ngerit (pengeritan) patut kawentenang sajeroning dasa warsa apisan, melarapan antuk pidabdab lan perarem Prajuru Desa.

Pawos 127

Rahina nenten kedadesang mendem utawi ngeseng layon :

Purnama, Tilem, Prewani, Kajeng Keliwon, Odalan lan rerahinan pura, Kahyangan Tiga, Saraswati, Pagerwesi, Galungan, Kuningan, selamin Ida Bhatara-Bhatari nyejer ring Bale Agung ritatkala Pekiyisan, Nyepi, Kala Gotongan miwah semut sedulur, anggara kasih, Redite Bala lan Pasah.

Pamiteges : *Kala gotongan ngedis, nenten wacakan rahina larangan.*

Palet 4

**INDIK MANUSA YADNYA**

Pawos 128

Manusa Yadnya inggih punika upakara-upakara dharmaning kauripan manusa, ngawit sakeng Kama Petak kelawan Kama Bang sajeroning garba, jantos kelayu sekar, sane dedudonanipun ring sor :

1. megedong-gedongan.

2. Embas Rare.
3. Kepus Udel.
4. Ngelapas aon (roras rahina).
5. Akambuhan (awulan pitung rahina).
6. Nyambutin utawi metelu bulanan (Tigang sasih).
7. Pawetonan (enem sasih).
8. Ngempugin (tumbuh untu).
9. Meketus.
10. Ngeraja swala utawi ngeraja singa.
11. Mepandes utawi metatah.
12. Mewiwaha.
13. Mewinten.

Pawos 129

Upakara-upakara inucap ring pawos 128, nista, madya, utama manut sastra agama lan Catur Dresta sanc kerajegang ring Desa Adat Seseh.

Palet 5

**INDIK BHUTA YADNYA**

Pawos 130

Bhuta Yadnya inggih punika upakara-upakara pebiyakalan ring pertiwi lan Perhyangan, sarwa prani miwah Bebhutan.

Pawos 131

Upakara-upakara pebiyakalan ring sarwa Prani :

1. Ring sarwa tumuwuh ritatkala Tumpek Pengarah (Saniscara keliwon wuku Wariga).
2. Ring sarwa ingon-ingon, ritatkala Tumpek Kandang (Saniscara Keliwon wuku Uye).
3. Upakara mekala-kalaan ring manuse, manut kegunannia.

Pawos 132

Upakara pebeyakalan ring Pertiwi, Kahyangan lan Bebhutan  
kewastanin Caru, Nista, Madya, utama manut kegunania, saha  
pepalihan caru inucap sekadi ring sor :

1. Eka Sata.

2. Panca Sata.

3. Panca Sanak.

4. Panca Kelud.

5. Rsi Gana.

Tawur agung lan selanturnia.

Pawos 133

Tiosan sekadi ring ajeng, taler sane kesinanggeh caru  
minakadi : Banten Saiban utawi Yadnya Sesa, kemargiang  
ngerahina nyabran wusan meratengan.

Pawos 134

Nyabran piodalan ring Pura Kahyangan Tiga, patut kewentenang  
pecaruan, senistannia caru Eka Sata, antuk Krama Banjar  
penyeledihin Desa.

Pawos 135

Nangken Sasih Kesanga (Tileming Kesanga) kebawos Ngerupuk,  
patut kawentenang pecaruan, sekadi ring sor :

1. Ring Bale agung : Caru Panca Sata.

2. Ring sowang - sowang paumahan, sanggah/merajan, ring  
natar, ring lebu, upacara pecaruan manut arah-arahan  
Kelian Desa Adat.

Pawos 136

Upakara pecaruan sane tiosan kemargiang sekadi ring sor :

1. Ring Sasih Kelima, kawentenang caru nagluk merana.
2. Ngaturang bungan lan pecaruan sane tiosan, manut sekadi perarem Krama Desa.

Pawos 137

Pawiwahan inggih punika petemon purusa lan predana melarapan antuk lulut asih, saha melarapan upa saksi sekala lan niskala manut agama.

Pawos 138

Pemargin Pawiwahan mejalaran antuk :

1. Mepadik : keriyinin antuk pemuput bawos sedurung ngerangkat.
2. Ngerorod : ngerangkat riyinan wawu kekerunayang.
3. Nyentana utawi nyeburin, risampun puput bebawosan saha ketegepin antuk upakara jauman.

Pawos 139

Pawiwahan patut manut ring kecaping Agama, tan kepatutang minakadi Gamia gumana miwah sano lianun.

Pawos 140

Pawiwahan mantuka ring wang tios agama, palut keparisuda antuk upakara pecolongan, penyambutin lan selantur ipun.

Pawos 141

Sajeroning pawiwahan pelaksanaan patl wangi kepatutang manut dresta, saha melarapan antuk upakara sepatutnia.

Pawos 142

Ngerangkat ke tiosan Desa risampun puput pekerunan, kepatutang mepamit ring Pura Kahyangan Tiga, mejalaran upakaran pemamitan.

Pawos 143

Dedudonan pekrunan ngerangkat, inggih punika :

1. Melaku : Sakeng Purusa patut mesadok ring Predana, prajuru Adat lan Dinas, melarapan antuk illikita lingga tangan sang ngerangkat.
2. Ngeluku : Penunggalan daging bebawosan, melarapan antuk pererasan kayun.
3. Bobotang : pemuput bawos indik tetegenan.

Pawos 144

Krama/semeton sane keanggehang sang alaki rabi (nganten), patut mesadok ring Prajuru Adat lan Dinas saha nunas pesayuban.

Pawos 145

Ngelaksanayang pawiwahan patut mesadok ring Prajuru Adat lan Dinas nitenin lan ninutin daging Undang-Undang panegarane, inggih punika UU No. 1 warsa 1974, PP.No. 9 warsa 1975, miwah peraturan-peraturan sane lianan.

Palet 2

**INDIK NYAPIAN**

Pawos 146

Pasah/palas merabian utawi lanang isteri ten sida kumpul, patut mesadok ring Prajuru Adat miwah Prajuru Dinas.

Pawos 147

Pemutus nyapian (pasah merabian) risampun polih illikita pastika sakeng Guru Wisesa utawi Pengadilan.

Pawos 148

Nyapian sane sampun polih pemutus sakeng Guru Wisesa utawi Pengadilan, patut ngaturang upakara Desa Saksi ring:

1. Bale Agung : Nyapian saking tiyos Desa.
2. Pelinggih Banjar : Nyapian saking Banjar Adat.

Pawos 149

Mungguing pemargin upakara Dewa Saksi, sekadi ring sor :

1. Kekaryanin olih sang Purusa sane pasah merabian.
2. Upakara Dewa Saksi ring Desa kesaksian olih Kelian desa Adat, ring Banjar olih Prajuru Banjar Adat, pinaka pemuput kemargiang olih Balian.
3. Galah pacang ngelaksanayang upakara puniki, melarapan antuk pemutus Kelian Desa Adat utawi Prajuru Banjar Adat.

Pawos 150

Ring sapa sira ugi sane nenten tinut ring daging pawos 149 ring ajeng, patut ketiwakang danda gung artha manut perarem.

Palet 3

**INDIK SENTANA**

Pawos 151

Sane inucap sentana inggih punika pratisentana lan sentana peperasan sane rajeg, saha patut polih waris miwah tetegenan sane pateh manut dresta.

Pawos 152

Sentana peperasan, risampun mecihna :

1. Me Widhi Widana manut pemargin Agama Hindu.
2. Kesaksiyang antuk Prajuru Adat lan Prajuru Dinas.
3. Wenten illikita pastika.
4. Kesiaran ring Banjar lan Desa, ritakala wenten paruman.

Pawos 153

Ngangkat sentana pengambilannia sakeng Purusa, yan tan wenten sakeng Purusa wawu dados sakeng Predana.

Pawos 154

Yan tan wenten sentana manut sekadi daging pawos 153, kepatutang ngangkat sentana wang tiosan sane megama Hindu.

Pawos 155

Ngangkat sentana kedadosang lintang ring adiri, sane yusanipun alitan ring sane ngangkat.

Palet 4

**INDIK WARIS**

Pawos 156

Sane kesinanggeh waris inggih punika artha berana lan tetegenan.

Pawos 157

Pedum waris mantuka ring sentana lanang utawi istri pateh, rikantun kebawos sentana rajeg.

Pawos 158

Waris (artha berana) ke pah antuk ahli waris, risampun pewartis puput ilen-ilennia sajeroning yadnya jantos ngelinggihang.

Pawos 159.

Nenten polih pahan waris, prade :

1. Nilar kawitan lan sesananing agama.
2. Sangkañing ngutang tetegenan, desa, agama Hindu (ninggal kedaton).
3. Alpaka Guru Rupaka, Guru Swadiyaya, manut Putra sesana.

SARGA VI

PRAKANGGE PURA

Pawos 160

Sane kasinanggeh Prakangge Pura inggih punika : Pemangku, Dasaran, Penyarikan lan Penyade.

Pawos 161

Prekangge Pura inucap ring pawos 160, kagentosin melarapan antuk keturunan.

Pawos 162

Prekangge-prekangge pura inucap, ring :

1. Pura Desa, Pemangku lan Penyarikan.
2. Pura Puseh, Pemangku lan Penyarikan.
3. Pura Dalem Kahyangan, Pemangku lan Penyarikan.
4. Pura Merajapati, Pemangku lan Penyarikan.

Pawos 163

Pewilangan karya utawi ayah-ayahan mantuka ring prekangge Pura, kapikukuhin manut pawilangan dresta.

Pawos 164.

Tata cara ngadegang Pemangku :

1. Ngewilangin tur ngemanggehang keturunan.
2. Nunas pewuwus, melarapan antuk nyanjan.
3. Sampun sinanggeh kepingit tur kepilih nganutin dresta.
4. Mediksa Widhi (mewinten).

Pamiteges : Ping ajeng Mangku mangdania melarapan antuk keturunan, yan tan wenten keturunannia utawi semetonnia sane tunggalan, wawu nganutin pemargi kaping kalih, yan tan sida pemargi kaping kalih, wawu kemargiang indik kaping tiga.

Pawos 165

Prekangge Pura sane tiwal ring pemargi, patut tiwakang danda manut perarem.

SARGA VII

WICARA LAN PAMIDANDA

Palet 1

INDIK WICARA.

Pawos 166

Sang sane wenang mawosin ping kalih mutusang seanan wicara inggih punika :

1. Kelian Dinas, prade sang mewicara tunggil bebanjaran.

2. Kelian Desa Adat, seananing wicara sane wenten ring wewidangan Desa.

Pawos 167

Mawosang indik wicara patut wenten pesadok ring Prajuru kemawon, wicara patut premangkin kehawosin tan nyantos mesadok.

Pawos 168

Prade sang mewicara nenten cumpu ring Kelian Desa, kengin nunas pemutus ring sang rumawos.

Palet 2

### INDIK PAMIDANDA

Pawos 169

Ring Banjar utawi, Desa wenang niwakang pamidanda ring wargannia sane sisip.

Pawos 170

Peniwak danda inucap kelaksanayang olih Kelian Dinas sajeroning bebanjaran Kelian Desa Adat seananing pamidanda ring wewidangan Desa.

Pawos 171

Agung alit pamidanda manut ring sisipnia, minakadi :

1. Danda artha miwah panikelan
2. Pengampurayang utawi nyewaka.
3. Upakara Penyangaskara.
4. Merampag.
5. Kesepe kang mekrama.
6. Kesepe kang mekrama, mebanjar, medesa, me Kahyangan Tiga lan me setra

Pawos 172

Ritepengan pacang niwakang danda, setiwosan ring kewenangan  
Kelian Desa taler perarem.

SARGA VIII

**NGUWAH NGUWUHIN AWIG-AWIG**

Pawos 173

Nguwah-nguwuhin awig-awig Desa puniki melarapan antuk  
paruman Desa, sangkaning pekarsan Krama Desa sane gilik  
seguluk.

Pawos 174

Nguwah nguwuhin awig-awig Desa puniki kelaksanayang olih  
Kelian Desa Adat kesarengin antuk utusan Banjar lan utusan  
Desa miwah sane lianan, manut sakeng pekarsan Kelian Desa.

SARGA IX

**P E M U P U T**

Pawos 175

Awig-awig puniki kewastānin Awig-awig Desa Adat Seseh.

Pawos 176

Seananing sane durung kebawos sajeroning daging awig-awig  
puniki, patut kelaksanayang manut tata cara sane sampun  
ketah memargi, saha kedulurin antuk perarem-perarem.

Pawos 177

Awig-awig puniki kemargiang ngawit perarem duk rahina  
Wrespati-Umande, Wuku Pahang, CaCih, Kasa ICaka 1917  
Tanggal Masehi 6 Juli 1995.

Pawos 178

Mekacihna pemutus awig-awig puniki, melarapan antuk  
lingga tangan Kelian Desa Adat lan Kelian Patus  
sewewidangan Desa Adat Seseh, saha kesaksian antuk  
Prajuru Dinas utawi Sang Rumawos (Sang Mawangrat).



SANG SANE NGELINGGA  
TANGANIN

1. Penglisan Kelian Desa Adat Seseh : I Nyoman Remyog
2. Penglingsir-penglisir :
  - I Made Madra I Made Madra
  - I Ketut Gangsyuh I Ketut Gangsyuh
  - I Made Anom Santiana I Made Anom Santiana
  - I Nyoman Ririd I Nyoman Ririd
  - I Wayan Gandem I Wayan Gandem
  - I Made Marya I Made Marya

Desa/Kelian Desa Adat Seseh :  

I Made Oka Pantar

SAKSI-SAKSI :

<p>                  Kepala Ds/Bk. Seseh,  <u>I Wayan Puil</u></p>	<p>                  Pelaksana Kepala Desa Munggu  <u>Drs. I Made Subawa</u></p>
<p>                  Camat Mengwi,  <u>Drs. I Made Subawa</u></p>	<p>                  Bupati Kepala Daerah Tk. II                  Badung  <u>Gusti Bagus Alit. Putra</u></p>

Nip. 600005904

**PEPALIHAN PEMILET SABHA  
DESA ADAT SESEH**

---

MENGGALANING SABHA : I Made Oka Yanta  
(Bendesa/Kelian Desa Adat)

PEMUCUK : 1. I Made Anom Santiana.  
2. I Ketut Gangsyuh.  
3. I Wayan Puji.

PENYARIKAN : 1. Drs. I Nyoman Winlia.  
2. I Made Raka.  
3. Ir. Ketut Sena.  
4. I Made Rinada.  
5. I Nyoman Pursa.

PETENGEN : 1. I Nyoman Suada.  
2. I Wayan Darmawan.  
3. Drs. I Made Nama.

PENGABIH : 1. I Made Marya.  
2. I Wayan Wirya.  
3. I Nyoman Dendi.  
4. I Nyoman Remyog.  
5. I Made Wena.  
6. I Made Sukenda.  
7. I Made Weda.  
8. I Wayan Gandem.  
9. I Wayan Letera.  
10. I Made Artana.  
11. I Ketut Dacwita.

#####

## Pareem -

- Indik Kerta Desa (Korven Sati).
- Indik C.P.D.
- Indik Krama Tamia
- Indik Kereplang
- Kesantusan Tolpor  
Narhita.
- Pembangunan - rumah pribadi
- Rumah Tinggal
- Hotel Melati
- Hotel Kerlintang